

鈴

山

堂

集

鈴山堂集卷第三十六目錄

神道碑

大明追封奉天翊運推誠宣力武臣特進榮祿
大夫昌化伯邵公神道碑

大明贈特進榮祿大夫太傅兼太子太傅成國
公謚榮康朱公神道碑

特進光祿大夫柱國太傅兼太子太傅駙馬都
尉京山侯贈左柱國謚榮恭崔公神道碑

榮祿大夫後軍都督府右都督掌錦衣衛事贈
太子太保陳公神道碑

明故光祿大夫柱國少保兼太子太保兵部尚
書贈太保謚恭襄張公神道碑

鈴山堂集卷第三十六

神道碑

大明追封奉天翊運推誠宣力武臣特進榮祿
大夫昌化伯邵公神道碑

聖天子弘化中興因心篤孝蓋嘗仰體 皇考獻皇
帝追本之意以遵奉 聖祖母太皇太后者無所不
至又推 太皇太后所自出凡褒卹典禮循先朝待
外戚故事而行者亦無所不至故昌化伯邵公暨夫
人楊氏寔維 太皇太后之考妣也先是公與夫人
俱早逝權厝於錢塘北山之青芝塢乃嘉靖己亥公

之孫錦衣指揮臣輔具疏以聞詔守臣擇地于西湖
南屏山之麓而改葬焉既命工曹往董其役又賜諭
祭一十四壇給供祀田八頃建祠墓下賜額曰發祥
表以石坊中爲勅命碑亭繚以石垣湖山抱揖寔據
佳勝而臣蒿承命撰文樹諸神道謹按邵公諱林字
懋清一字宗茂其先洛陽人也曾祖某徙揚之興化
縣祖壽再徙杭城父義母彭氏公少而岐嶷長而魁
梧倜儻有大志好善敦義楊夫人式克相之嘗夢鳳
鳥翔于其庭而太皇太后生天順庚辰被選入內
庭事憲宗純皇帝誕育獻皇及岐惠王雍

王進封貴妃於是贈公爲昭勇將軍飾衣衛指揮
使楊爲淑人 今上臨御上 皇太后尊號曰壽安
皇太后已而加尊孝惠康肅溫仁懿順協天祐聖太
皇太后進贈公爲奉天翊運推誠宣力武臣特進榮
祿大夫柱國昌化伯楊加贈夫人自公高祖王父而
下咸錫贈封而官其子姓諸從湛恩鴻龐覃被一門
於戲盛矣昔有周詩人詠歌文王之德必本於摯仲
氏壬又曰思齊太壬文王之母以見文王之德之所
以成實由於聖母之德行純備有以致之也我 皇
考之德上媲文王 太皇太后之懿增光京室植本

渚源鍾靈發耀繼摯主而有作非公與夫人協德之
慶哉臣謹拜手叙次如右而爲銘曰

維昔太妊嗣徽周姜詩詠恩齊姬祚以昌維我
太
后姜壬是則寔生 睿考備有聖德自天眷命濬發
其祥應圖受祉肇啓我 皇惟 皇達孝推本所自
賁錫公門施及孫子爰命有司飭其祠墳殷禮備陳
俎豆欣欣公歿雖久厥澤惟新顯盛光大世莫與倫
屏山蒼蒼湖水之渌伉儷同藏風氣攸萃輔臣奉詔
勒石道周永示後人以贊碩休

大明贈特進榮祿大夫太傅兼太子太傅成國

公謚榮康朱公神道碑

榮康朱公以嘉靖丙申春將事 孝陵道病召還其
年七月六日薨于正寢計聞 上震悼輟朝賜棺殮
命有司治窆諭祭如制贈太保榮康其賜謚也其子
希忠等以 月 日既葬公子懷柔縣北澤山欽賜
先塋之次及希忠嗣爵以恭恪慎勤爲 上所特眷
簡入內直朝夕左右加食祿至一百石賜肩輿賜內
乘馬仍推恩錫其三世於是榮康公得進贈特進榮
祿大夫太傅兼太子太傅誥詞有曰丕懋之勲揚于
當世未盡之祉發于後人蓋異典云希忠將樹隧道

之碑以彰榮寵昭先德乃詣予請曰先人奄棄希忠等幼稚未能即事墓隧之表用是久虛深惟先德弗耀遐永是懼敢茲以爲請予昔於榮康公數得承顏色知其平生而與今太傳公在直共事重之姻好則所以書公之碑者其曷可辭謹按朱氏之先鳳陽懷遠人六世祖亮任燕山護衛副千戶子能嗣其職從成祖決策靖難功第一封成國公追封東平王謚武烈子勇嗣從英廟北狩死兵間追封東平王謚武愍子儀嗣留守南京卒謚莊簡子輔嗣繼守南京加太子太傅佩平胡將軍印卒贈太傅謚恭僖長子

麟嗣麟卒無後而公恭僖次子也乃嗣兄爵公諱鳳
字鳴周早通書史勤學好問識達大體以清慎自持
風雨寒暑不廢朝謁初管五千營改議修馬政覈軍
實撫疲繭蓄壯銳營務聿新又上備邊禦虜七事皆
精練剴切爲當事者所格然言官自是交薦公矣是
時上方勵精鑒別群臣以公爲才寵異之禮部請
朝儀詔以公勲舊重臣充班首上親祀郊廟以公
守承天門凡舉大祭祀皆遣公行禮冊封宸妃充正
使屢荷金幣蟒服鎧劔書籍及人口之賜冊封荆王
復充正使所過州郡嚴約下人贈遺皆却焉甲午春

推公南京守備詔特用公掌中軍都督府事嘗因災
變特疏求退蓋前此勲臣無引災自陳者上益賢
之既又以疾乞解政所親勸令少須公曰府營重寄
豈養疾持祿地耶上察其誠聽罷府事而公薨矣
公孝友天至母張太夫人蚤逝言及輒悲感事恭僖
公無故不去側侍賓客執禮不少解父疾籲天請以
身代及卒哀毀逾禮後泣中府任益悲曰是先人所
嘗履者初兄麟以逆瑾誅革勲衛幾失爵或者謂公
次嫡宜嗣公避嫌去之南京居焉麟家用日落多所
假貸公悉代償之麟奉使承天寢疾公聞泝江兼程

往視護其喪以歸仍持服三年曰吾兄之無後也無
庶弟繼教養尤至群從貧乏者爲經紀其婚喪姊妹
已嫁而貧者亦然性儉約無他嗜好獨重詞翰而先
世手澤珍惜尤甚蓋公率德敦行樂善蹈仁厥用弗
究壽僅五十一而終時論惜之然有今太傅公受知
聖上寵綏眷遇之隆世無其比則豈非天道福善
之驗哉公元配白氏尚書恭敏公珪之孫繼徐少師
文靖公溥之孫又繼楊及陳而白楊皆封成國夫人
陳爲睢寧伯榮靖之曾孫今加封成國太夫人子男
三長即太傅希忠次希孝以平陰死事錄授錦衣勲

衛今官都指揮使管衛事次希祖孫男一人時泰銘
曰於赫文祖造我邦入靖內難開虞唐天挺羣策
隨龍翔東平武畧何沆沆摧堅陷敵維鷹揚昨列茅
土爵以王盟存帶礪券冊蔽平陰邁會時勳勦提兵
沙漠殂窮荒慶流胤嗣燁以昌五葉濬發稱榮康淳
朴內蘊含文章皇曰臣哉爾惟良大廷朝謁首班
行屬司材官柄蹶張明裡遣代奉珪璋恪秉精白忠
勤將急難喜施義問彰鍾祥篤斐歸我方楚太傅
金玉相入侍帷幄日贊襄帝追先烈恩露濺龍章
褒錫泉臺香穹碑伉立山之岡勒銘載德揚耿光世

世與國同無疆

明故特進光祿大夫柱國太傅兼太子太傅駙
馬都尉京山侯贈左柱國謚榮恭崔公神道

碑

嘉靖己酉夏六月 日京山侯崔公卒于位訃聞

皇上嘆悼輟視朝一日錫之贈謚賜諭祭一十六壇
命工部給棺槨營葬事公在弘治間尚 永康大長
公主 孝宗皇帝之女弟也先是戊申十月王薨賜
葬于都城南下馬社梓子口之原至是啓壙而合葬
焉其隧上之碑宜有文公予驥徵以請於予比年予

與公同內直又與公甥壻衍聖孔公聯姻好弗可以
辭謹按狀公諱元字懋仁太原代州人也曾祖諱璟
隱德弗仕祖諱震山東泰安州判官考諱儒太學生
三世俱以公貴贈京山侯加贈太傅兼太子太傅妣
俱夫人公少從泰安公宦邸受毛詩尚書泰安公夢
有異徵曰是當大吾門乎果被選尚主拜駙馬都尉
公美姿儀博覽群籍善詩戚畹諸貴皆自謂莫及公
卿大臣折行輩與之交賢聲翕然聞于時敏慧有謀
朝廷每有大遣命必屬之正德己卯江西逆濠圖爲
不軌武皇命公偕都御史顏頤壽齋勅往諭行至

聞濠已反乃旋 武皇晏駕公承 昭聖皇太后

懿旨齋金符詣興邸奉迎 今上皇帝入嗣大統

上一見知公可屬大事凡有謀議輒咨詢之嘉靖改
元以功封奉天翊衛推誠宣力武臣特進榮祿大夫
柱國京山侯食祿一千五百石賜誥券奉命護 孝

惠皇太后梓宮葬茂陵又奉命之安陸奉迎 獻皇

帝神主來京命掌宗人府事上冊皇天泰號命公充

捧冊表受使禮成加太子太傅 上南幸承天命公

偕勲輔五臣扈蹕騎從途遇親王朝見命行殿侍班

上渡河侍舟中賜詩命和 車駕還京遂命護

獻皇后梓宮南祔 顯陵事竣慰勞有加自是召直
內苑時承顧問公明習典制凡有敷對罔不克當

上意又時時撰進文字悉見采用命乘馬禁中泛舟
太液命代拜先聖先師于永明後殿命護 孝烈皇

后梓宮葬永陵 皇太子加冠命充掌冠使 上念

公等侍直勤勞加公太保再加太傅再加特進光祿

大夫又歲加食米一百石他如白金綺幣玉帶麟麟

之服上尊珍饌異恩蕃賚不可勝紀生成化戊戌十

二月一日暨卒享年七十有二公母弟三人允登進

士歷官山東叅政充魁鄉薦次光皆早卒公撫其孤

成底成立代之親族待以舉火者尤多云長子鳳徵娶尚書劉公舜卿之女長女適安昌伯錢惟圻封夫人皆主出俱早卒次子驥徵側室周出公卒後上特恩擢爲錦衣指揮僉事次女適平江伯陳公長子王謨嗚呼自古尚婚帝室者亦繁矣若乃偕老齊壽具膺福履會遘興運簡託心膂茲其尤鮮儷者哉銘曰

汾晉毓秀昴辰發祥姿挺鸞鵠才美珪璋爲帝之甥館于貳室玉帶蟬冠威儀抑抑運遘昌辰翼龍以升勅符載捧江漢徂征廼爵通侯金書錫券酬勤

褒功 帝隆其眷出護變躡入奉禁廬夙夜在公勤
誠弗渝梁木云摧華榮奄瘁纓綬含哀 當寧興喟
都城之南鬱起高墳過者下車眎茲刻文

明故榮祿大夫後軍都督府右都督掌錦衣衛
事贈太子太保陳公神道碑

今上皇帝入繼大統維時扈從諸臣從龍而起蒙藉
寵靈荐陟華顯流光錫祚垂裕無窮豈非千載一時
之遇哉若右都督掌錦衣衛事陳公其一也公諱寅
字敬夫其先山東武定州人曾祖玘洪武中以功授
燕山左衛副千戶因家京師祖貴父政皆世其官弘

治庚戌 獻皇帝之國政以才選授管群牧所事卒
于官公襲父職年二十四即小心勤事朝夕弗懈人
咸以遠大期之既扈蹕來京遂陞錦衣衛指揮僉事
有詔公等子孫皆與世襲尋命公提督官校管理京
城街道又以督理諸大工宗廟及皇史宬成陞指揮
使管西司房事九廟成陞都指揮同知掌本衛事慈
寧宮成陞後軍都督府都督僉事仍掌衛事奉先殿
成陞都督同知皇穹宇成陞右都督 上恭冊皇天
太號以公等扈從行勞加服色俸級而前後所蒙白
金綺幣及羊酒等賜不可勝紀公重厚簡默器度恢

弘果斷剛方事無留滯隨所任使克舉其職以故受
上簡知養龍特異云歲乙巳公感末疾具疏懇乞
解任允之仍命支月俸量給軍校應用公寢疾逾五
年嘉靖己酉五月二十八日卒于第距生弘治乙卯
十一月享年五十有五公少孤克自樹立事母張太
夫人至孝撫弟吳友愛備至官躋武階之極而謙約
畏慎安靜老成乞身蚤休優游以終可謂福履之盛
也已曾祖祖考皆封如公之官妣皆夫人配蔚氏封
夫人子男二長翺騰授錦衣衛指揮僉事管南司事
次詡女一長適都督沈至次尚幼公之卒也 上聞

悼惜遣官諭祭營葬如制仍加贈太子太保其年

月 日葬于都城崇文門外西郊亭之原而朔請予
書諸墓道之碑乃叙而銘曰

龍躍兮郢中率雲附兮景從公乘時兮奮庸首翊戴
方輔忠掌禁旅兮維熊恒夙夜兮匪躬沐恩渥兮優
隆何乘化兮長終 皇軫念兮哀恫賁典兮營封
侈千載兮遭逢勒銘示兮無窮

明故光祿大夫柱國少保兼太子太保兵部尚

書贈太保謚恭襄張公神道碑

嘉靖壬寅冬十月三十日大司馬東瀛張公卒于位

明年二月二十二日癸于都城南魏村社之原嗣子
子中等以大宗伯費公所述公事行來泣告曰惟先
公受聖恩致位本兵夙夜兢兢以不任付託是懼頃
因邊患竭心籌思廢寢與食阡于疾危馴至大故廢
幾所謂鞠躬盡瘁者矣惟是墓隧有碑而無辭以白
先公之心不肖孤厥罪云何敢用以請予與公同舉
進士同官于朝幾四十年義惡乎可辭謹按公諱瓚
字廷獻姓張氏河間滄州人曾祖諱聚國初以功陞
瀋陽左衛百戶尋陞府軍左衛副千戶祖諱能考諱
傑代繼其職三世俱以公貴累贈光祿大夫太子太

兵部尚書妣俱贈一品夫人公舉弘治乙丑進士
選爲吏科給事中歷兵科都給事中擢通政叅議左
右通政太常寺卿陞通政使公體貌豐碩音吐洪暢
進止有儀常奏事廷中 皇上輒注目視之以戶部
侍郎兼右僉都御史督延綏寧夏軍餉改督宣大軍
餉大同軍戕其帥據城以叛時議將闔城屠之人心
震恐叛者繼起 上旣以失事者置之法遂命公爲
兵部侍郎兼左副都御史總制其地公計擒其渠惡
二十餘人而盡釋其脅從者民乃安堵遮道羅拜肖
公像祠之由是 上益簡注知公可大屬矣及還用

廷推提督兩廣軍務會兵部尚書員缺銓部擬四五人上意獨屬公行未數舍召還乃拜爲兵部尚書公旣受任殫力圖事安南以其國亂不修職貢者二十餘年於是黎氏以其變來告詔興師討之下禮兵二部議前後凡數十䟽乃得俞旨遣文武重臣往宣布德威莫氏遣使叩闕持表以降公預力焉諸邊奏報至雖事孔棘公鎮之以靜凡所題覆籌畫審固動中機宜嘗條陳十六事上皆嘉納行之丙申秋虜吉囊等屢寇邊境公選將薦械先後遇敵于賀蘭諸山于延綏芹菜河蕤黎川于寧夏斬獲首級數百

西吉囊刺不台再入寇大同又斬獲二百餘人
彩幣陰一子爲錦衣千戶世襲公嘗涉歷邊境具知
輿地阨塞又周於咨謀故能料敵制勝如此公毋奏
用聞帥邊吏畧其細行惟取其有智識勇畧足以事
事者江洋冠聚衆千人稱亂守臣請兵討之公舉革
任都指揮湯慶以往人或難之公曰使詐使貪兵家
常理吾知其能集事耳慶果報平寇公所任人多類
此當是時上以本兵務重專意屬公雖時有煩言
而宸眷益隆委用益堅先後乞休凡十餘疏俱荷
溫旨慰留車駕幸承天以公留守京師既進位宮

保一品復進少保授光祿大夫柱國扈從 山陵特
賜飛魚服其他賜賚不可悉紀在部八年事體明練
酬應曲當字量恢豁不見喜怒之色雖有犯者亦莫
之校屢獲邊功受上賞福澤充溢光裕前後雖才智
所能或者謂公器大蓄厚福量所鍾亦詎不然哉生
成化丁酉月 日卒之日享年七十元配王氏
繼楊氏贈封皆一品夫人有子四人曰子中始襲千
戶今累陞錦衣指揮僉事曰子和 舍人 子正
錦衣副千戶曰子直冠帶總旗女適公僉王鎮撫男
四人曰繼文國子生曰繼德次尚幼論者曰天之生

於世豈不多乎顧所享豐齊薄厚每不齊公起諸
生致位六卿階一品秉國戎政受上眷注廷臣如
公者不多見及其卒也上爲恤然輟視朝一日賜
祭九壇贈太保賜諡恭襄恩禮終始極其完備矧夫
子孫衆多又皆孝友謙慎克保厥家由是而觀公之
得於天者厚矣是豈人力之所可強而致哉予故論
次揭諸石而復系之以辭用以慰公於冥漠其辭曰
帝都之東瀛海浹蘊靈毓秀厥有自公生魁岸偉幹
體端厚嶷重若山峙諫垣銀臺歷長貳廷中奏對稱
上旨重瞳屢回勞注視戶曹再命給饌餽狂童叫

驩猶莫制轉危爲安出謀智殲厥渠魁從國治西民
德之競祠祀惟 帝簡知眷日起拔置樞曹典兵紀
肅肅在公靡怠易運籌策陳大計猛將材官或跣
弛公能用之隨器使西掃長蛇北封豕日南束首獻
其贊違言雖煩據形似 帝明弗貳保終始旣踐卿
保蕃寵祉貴壽考終復多嗣簪組蟬聯賞延世具集
諸福疇克爾城南之阡魏村里 皇典卹加恩備至
宜有紀述詔來襁予忝執筆在太史

附

墓誌銘

明故太保兼太子太傅平江伯贈太傅謚武襄

陳公墓誌銘

太保平江陳公薨 上驚問輔臣嵩曰主何遽歿耶

上神聖文武志殲胡夷而公方受倚注用見悼問

乃命有司治塋 賜祭十五壇贈太傅謚武襄其子

王謨得給驛奉輓歸塋皆殊數也謨且行來乞銘于

予初予為祭酒公始襲封習禮成均有師生雅既顯

用事予恂謹如一日誼故厚已而締婚益親方期其

功業未艾而奄忽以逝予哭之哀盖予以老辭四方
乞文之請久矣謨泣曰先君昔備行間頗以微勞自
見幸假寵靈思竭力禦虜報聖主有志弗就居未
嘗不歎歔慷慨今已矣非翁言無以慰地下嗟乎予
其可辭哉公諱圭字世秉廬州合肥人也始祖恭襄
公瑄有大功于洪武永樂間實始封平江伯高祖佐
曾祖裕皆嗣伯爵祖鐸考麟以公嗣季父熊襲封皆
贈伯爵祖妣妣皆贈平江伯夫人公始領宿衛掌京
營僉書中軍府用臺諫交薦出鎮兩廣為總兵官會
封川寇猖獗公上疏請剿督諸將分道攻擒其渠魁

斬數千級俘獲其衆加太子太保復平柳慶里隆等
賊斬獲如封川加太保復戡賀連賊如柳慶廕一子
錦衣百戶三捷皆賜金綺時交夷范子儀等寇欽廉
諸郡黎岐寇瓊崖相犄角為應援公移文安南都統
曉以利害使縛子儀來獻而亟出銳師攻黎軍黎勢
孤援失不能支擒斬尤多遂靖交寇復廕一子錦衣
百戶加祿米歲四十石粵于今為要荒封川諸處皆
遂洞深菁崖壑蚪互諸蠻夷所窟穴或乘間出剽如
飄風攻其東則西遁戢其左則右發號難剪除而前
政徒擁兵為尊大有警蓄縮委艱其下士無肯為用

力者則咸謂賊難制獨公善方畧精騎射常與士分
甘均苦聞賊所往環甲上馬彎弓注矢向賊為衆先
士皆增奮無不一當百者在粵且十年諸所殲小賊
不可勝數其大者如前四征皆蒙瘴霧深入所嚮必
克鋒莫敢當 上知公才可任召還掌後軍府會虜
數闕諸邊而逆臣鸞勾引入犯鸞既伏法 上益釐
正京營之制飭諸武備而提督者難其人本兵疏舉
二人皆不允 御批特以授公公入營問所利病條
去其甚者事皆與更始將士懽呼稱慶及申號令整
約束紀律甚嚴今總督尚書許公論時協理戎政與

公期戮力滅賊公嘗傾囊養敢死士于家所費不貲士皆投石超距方虜犯紫荆攻浮圖峪甚急公毅然請出戰木兵以大將居守不宜輕動上知公忠勇特許之廼營于都城外盧溝值虜退而止次年虜復犯古址或議當九門列營為備公以徒示弱無益竟不樹營而虜亦去蓋其識緩急當機宜如此築京師外城公實董其役城成加太子太傅又廕一子錦衣百戶云公生正德己巳十一月二十一日卒嘉靖甲寅十二月十八日年四十有六元配徐氏太師定國公光祿女繼配仇氏皆封伯夫人再配張氏子男五

長即王謨嗣伯爵次王烈王猷王制皆錦衣百戶次
王言女一許聘予孫尚賓司承紹慶公自幼敏慧喜
親墳史性樸茂如儒生似不能言至其操執剛挺凜
不可奪雖謙抑禮士而耻嬖媚趨媚之為不肯苟失
足於人以故取忤當途屢有建白為所抑然公自遂
弗悔也夫人仇者逆鸞女弟也公深嫉鸞鸞數入密
疏言公短幾中奇禍賴上明察愈益重公盖公以
忠誠幹畧受上簡知非有左右先容之者公感激
殊遇以身徇國真有馬革裹屍之志庶幾所謂國之
盡臣者嗟乎今安有若人哉此予之哀之匪為親暱

之私也先是有大星隕光亘數十丈占者謂應在天
將其然豈偶然哉謨等以明年乙卯七月初二日葬
公于南京大寧山祖塋之次銘曰

陳始恭襄昌運是翊治漕通道允底厥績名在冊書
萬世無斁爰暨數葉式襄是承出鎮南粵益懋威聲
孰不為順叛孽以興斧鉞戟纛受命專征乃奮其武
架八其阻震如雷霆疾于風雨繫其鯨鯢靖我疆土
帝嘉虎臣疊奏膚功曰尔其還以翼朕躬猷猷方
棘修我兵戎公来自南于帝之所有嚴有翼爰整
其旅撫劍長視目無醜虜我既有脩虜亦遠迹將犁

漢庭勒功燕石何志之銳乃奪之亟大星曉隕壯業
以隳天則弗吊人也何為我懷于公志在匡國矢其
謀猷忌者所抑其不能者曰匪我力弗摧其剛弗毀
其方矧是正直士行之良刻銘示後公也弗亡

金華山堂集卷第二十七目錄

神道碑

明故兵部尚書兼都察院右副都御史贈太子

太保謚襄毅潘公神道碑

明故資政大夫都察院左都御史贈太子少保

吏部尚書謚莊靖宋公神道碑

明故吏部右侍郎王公神道碑

明故通議大夫兵部左侍郎陶公神道碑

明故嘉議大夫南京都察院右副都御史趙公

神道碑

鈴山堂集卷第三十七

神道碑

明故兵部尚書兼都察院右副都御史贈太子

太保謚襄毅潘公神道碑

嘉靖辛丑夏 詔重建 太廟遴選採木大臣僉議
工部侍郎潘公前建 七陵及 奉先殿實董採木
之役績有成効宜無踰潘公者而公謁告居里於是
得 旨起公于家公受命遄發沿襄漢涉風濤衝冒
霧露以往來川貴之間深林窄谷鳥道巘巘崎嶇之
境躬自援歷不以勸辭公計慮精審區畫有條徵發

不滯以故人樂於從事不二年獲尋丈大木三百有奇餘木皆稱 廟成賜白金綵幣進工部尚書回籍需用未幾起公爲兵部尚書兼右副都御史提督兩廣軍務公前在蜀過勞得疾至是疾益加行次饒州乃連疏乞休歸而以嘉靖甲辰九月十一日卒于正寢訃聞 上深憫悼命有司諭祭營葬特贈官保一品謚襄毅蓋異數云公諱鑑字希古徽之婺源人初家食與從父今少司馬珍兄少司馬旦弟僉憲選更相切磨薦志績學年十四代父兄執門戶後上書縣令試其文奇之旣領應天鄉薦登正德戊辰進士

授南京大理評事歷寺副正福建按察僉事丁母
復除四川改浙江僉事陞貴州按察副使丁外艱復
除河南信陽兵備陞四川按察使改山西陞江西右
布政使四川左使都察院右副都御史巡撫四川遂
改工部右侍郎督木以至今官公初在閩有寇蘇秉
規糾亡命稱大噍哪據海島爲患公分巡其地討平
之南安盜起攻仙遊城將官受檄逗遛不進乃自擐
甲檄興泉民兵伏其歸路邀擊斬獲殆盡福州戊卒
作亂勢猖獗公設方畧擒捕會邵武卒亦叛則單車
馳往諭之而叛者始定於是公名藉起撫蜀以諸縣

衛賦輕重無等吏緣爲奸爲畫一法著之令甲賦賴以平鹽井麗江兩首相仇殺公約雲南撫臣持檄諭之即解請內轄關南寇馬興率衆逼蜀境蠻落十五寨咸負山谷相結爲援公以計緩之密授總兵等方畧以兵塞諸要遂帥精騎擣平其巢事聞賜白金彩幣公在蜀久知地里險易察於民俗之宜周知夷情之變凡撫循安輯通商便民及詰兵控夷之政大者驛聞小者案舉其治蜀論者謂有張乖崖之風焉督木事完奏言湖廣川貴諸府其民疲於採辦困憊不得息請量議蠲復朝廷從之兩廣之起上意簡在

特重用之而公弗祿矣公儀觀修挺性夷易不爲危
言激論而耿介壁立不可干以私治官如家恭勤潔
白之操始終一致焉生成化壬寅八月二十一日享
年六十有三曾祖諱濟祖諱遺安父諱琦祖父俱以
公貴贈通議大夫工部右侍郎祖母呂氏母施氏俱
贈淑人配呂氏封淑人子二長溫次澄俱廕補國子
生女三孫男三孫女一溫等將以 年 月 日葬
公于 山之原而詣予請銘其神道予往交于潘氏
諸公而司馬公希周又同年同僚實以書來請故銘
不得辭銘曰

奕奕潘公定望新安譬彼喬木碩大以繁維三司馬
乘時蔚起同本殊榦爲材匪異公年十四斬然脫穎
上書公庭規切時政粵旣登第宦績四敷刑察冤獄
兵殲叛羗在蜀歲多治績尤最夷謗其威民懷其惠
國有大役起公于家董治得宜人罔怨嗟棟梁鉅材
萬里雲集清廟告成帝心有擇乃頒綸命晉位司
空寵賚駢蕃以旌厥功惟計在國不爽錙銖惟志在
民利安是圖內直外方肅肅其度秉執有確不如不
吐大受方隆遽弗憇遺庸告後人文列在碑

明故資政大夫都察院左都御史贈太子少保

吏部尚書謚莊靖宋公神道碑

嘉靖丙午之冬上召南京兵部尚書宋公爲都察院左都御史公以疾辭不允時當天下諸司述職聚闕下臺丞實與銓部同職考察公至則力疾稽牘評隲臧否手披心計殫日夕由是疾增劇乃丁未正月之八日卒于京師里第上聞震悼命有司諭祭營葬如例而贈公太子少保吏部尚書賜謚莊靖蓋異數云於是公次子鄉進士介慶奉柩歸豫章而葬謂蒿於公同鄉又同弘治乙丑進士請書神道之碑憶與公賜第後仕宦中外垂四十三載當時同輩存者

無幾而公又不可作矣烏能已於情邪謹按公諱景
字以賢世家南昌奉新曾祖惟寧祖鑑有厚德能施
其鄉考迪嘉妣涂氏公既貴累贈其祖與考皆資政
大夫南京吏部尚書妣皆夫人公少孤奮于學弱冠
爲諸生試每居首器體凝重識者占爲公輔之器弘
治辛酉舉江西鄉薦再會試擢上第授河南睢州知
州治行卓聞改河南道監察御史是時逆瑾竊柄公
慨然引疾去家居十四年足不及城市將終焉而
物望鬱起提學田公汝籽巡撫盛公應期先後䟽薦
起爲浙江按察僉事未踰年聞母病即棄官歸太夫

人卒哀痛勺水不入口者五日服除陞山西副使分州介休饑民相聚爲盜殺地方官勢張甚撫按檄公往征之督率行伍躬冒矢石擒獲其渠魁釋降附宥脅從民賴以安青羊山賊陳卿亂公又合兵討殪之奏以潞州爲府而創立平順縣皆公之功爲多陞山東叅政改福建尋陞四川右布政使俱未赴改山西左使公以晉陽地瘠賦繁民多逃竄地畝虛稅責償平民請召人佃種而坐以輕折又定九則徵派之例以祛里胥積弊咸著爲令轉南京光祿寺卿擢都察院右副都御史總督南京糧儲革攬納禁糧長揭

債減呈遞樣米謹通關之驗收京儲以清改左副都御史佐理院事歷陞刑部左右侍郎拜南京工部尚書時脩南京奉先殿及舊邸世子府又造黃船公節費料十之七八事竣有白金文綺之賜改南京吏部旋改南京兵部叅贊機務至即奏裁守備叅隨人役考選武職清查快船困弊精覈養馬利害戎政肅然公履行端嚴執守堅確人不敢干以私然貌恭氣和於物無忤故賢者樂之而不善者亦未嘗有怨焉官雖久自奉不異布素方 聖明倚毗召正臺端朝野瞻望而公以一疾不起哲人云亡豈非世道之大恫

哉公配張氏累封夫人子男五長垂慶蔭爲國子生
次即介慶次承慶縣學生次和慶具慶女二孫男三
卜以其年月日癸公某山之原余叙而系之銘曰

宋有廣平式懋高風載其勲伐爲唐宗工顯允莊靖
名德攸同金錫玉振精美明通初筮河郡繼展臺驄
稷氛蔽日林莽潛蹤旣起從政一節匪躬其勤三晉
秉憲卽戎開府荆邑誕著膚功乃貳邦刑乃正司空
冢卿司馬保釐舊宮維茲都臺執法在中帝命維
何曰維清忠一陽占候公來自東公來自東四牡麗
龐而弗我留駕言長終宮保晉秩美謚聿崇瞻彼玄

堂有石斯龔樹文撰德以告無窮

明故吏部右侍郎王公神道碑

吏部侍郎王公諱道字純甫山東武城人也公之行義孚於鄉而聞譽重於當世偉矣昔在正德辛未之歲舉進士選入中秘時山東寇亂欲奉祖母避地江南上疏乞補學職詞極懇切得應天學教授居應天學二載陞南京儀部主事召改吏部驗封歷考功文選中更憂制前後在吏部十年雅操端潔大學士西樵方公上言王其學行純正識度宏遠可備宮僚勸講之職乃擢春坊左諭德公引疾固辭曰朝廷以名

器爲重不輕假人以不次之官而人臣惟義分是安
當致謹於非分之獲伏望收回成命庶大臣所薦雖
不得經明行修之士猶不失安分知耻之人於是得
旨允以病歸公雖去而名益高士大夫日跂其復用
居一載起爲南京國子祭酒未幾又以疾乞歸自是
一意家居屏迹城府讀書講學種樹灌園以自適蓋
不通仕籍者十有三年而當是時自公卿以至臺諫
薦䟽日至嘉靖丙午起爲南京太常卿未至遷南京
戶部侍郎尋改禮侍召掌北雍履任三月改吏部右
侍郎然僅閱月公以屬疾遂不起矣公貌厚而氣溫

學篤而志遠始也馳騁詞翰旣而嘆曰此無益也乃
遂研精於義理之學取宋儒程朱書讀之旣又取論
語一部反覆潛玩有悅于心曰聖門平實簡易之學
固如是也公雖潛心理學而見世之立門戶相標榜
者則深耻之嘗言漢以前無名道學者其人品如張
文成曹相國黃叔度管幼安皆真道學之流雖老釋
二氏亦各有所見不可厚非凡其言議不隨時苟同
故能表見輩流大自樹立不爲利害所動進退從容
累遷銓曹兩任國子執法端教表率人才期於俗變
風美入官雖久自奉如寒素是以君子察其行而考

其言推其用心而需其柄用以福生民利國家而天
不憖遺遽云以歿嗚呼夫豈斯人之不幸哉公所著
書有大學億老子億易書詩春秋等億諸史論斷大
學衍義論斷批點六子書及韓柳歐蘇文若干卷公
於書無所不讀精擇強記妙契疾書其所論著義理
深到剖決明當自陰陽律曆醫卜農桑刑名地志之
類靡不通貫曉悉焉曾祖諱復禮祖諱綸考諱琮贈
吏部郎中配李氏生公公生成化丁未享年六十有
一卒嘉靖丁未七月二十一日訃聞詔賜祭葬如例
元配李氏封宜人繼張氏子男三人長幼康舉于鄉

金石錄卷之二十一
次幼廣幼庶女適曹珮往予承乏吏部以侍郎掌部
事時公爲驗封郎中特越常序奏改公爲文選予以
此忤用事者至是幼康以神道之文爲請曰知先人
者莫如公然則非余誰宜銘銘曰

世每遷誘襲利僭見所可赴若湍奔往往競取以爭
喧有篤君子視浮雲避遠聲利耳不聞退然稚志樂
丘樊玩心高明究典墳卓爾大雅寔不群成均銓署
楊令芬貪者可廉薄使敦翮兮謝世遺垢氛有考其
不在斯文

明故通議大夫兵部左侍郎陶公神道碑

敬皇帝在御承 列聖理化熙洽之餘恩仁深流風
教彌篤學士大夫多端恪鯁亮而一出於惇實發諸
言議施諸政事隨其所處咸有利於國家生民雖歷
險難不易其志其用不窮蓋至于今人倫風軌未嘗
不賴之也以予所知若前給事中今少司馬南川陶
公非所謂若人者耶公諱諧字世和起浙省解元登
弘治丙辰進士選入中秘已而授職諫垣公遇事敢
言首疏乞緝熙聖學以裨治道又欲以大學衍義置
禁中以備退覽至 武宗時權奸擅政事多內降公
直言駁正無所回休其疏有曰遠讒佞以一政令修

人事以弭災異戒逸遊以保治安皆指切時政而戒
逸遊一疏斥言大闕丘聚劉瑾輩蠱惑之罪是時瑾
等日伺公所爲思有以中之久無所得乃以他事杖
公落其職隨有旨責廷臣朋黨罷輔臣劉謝二公及
知名士五十有三人而公猶列名其中旣又搜織逮
公下之詔獄與尚書劉公大夏潘公蕃同謫戍肅州
公怡然就道在肅日與二公酬詠或感物興懷繾綣
忠厚托諸比況有古作者之意焉瑾誅放還家居若
千年爲嘉靖改元 今上皇帝嗣位采錄天下舊德
名人乃起公巢司由僉陟副荐陞潘岳之長始任江

右繼則皆在河南澤敷政行乃擢中丞督理南贛汀漳等處軍務至則條數事奏行曰重守令專分守寬農民懲貪吏凡以重本厚生防患去慝爲務兩廣總督員缺遷公少司馬仍兼臺秩往蒞之先是群盜久負遐阻不可悉平公隨在撫剿賞罰信必所向克捷前後俘馘以萬計所輯寧菁峒以千計公推讓群力不以自張雖荷恩賚金幣而人以謂未稱其功也以母喪歸服闋起公入贊兵本公閑達機宜羽儀朝行物望攸屬嘉靖辛丑以廟災陳乞避位遂致仕歸君子惜之云公誠篤毅直而遇事審慎發必當理風

節在諫垣善政在蕃服勲績在臺憲而行義在鄉黨
弗履考終靡憾也已陶系出靖節之後有爲台守者
因家于台自台徙會稽之陶家堰曾祖諱仕成祖諱
壽考諱慥咸有隱德祖與考以公貴俱贈兵部左侍
郎兼左僉都御史妣章氏封太淑人配沈氏繼配楊
氏贈封皆淑人子男三長師善次師賢皆國子生次
師蓋孫男十三人大壯中順天鄉試次大原大升大
受大臨大節大成大恒大晉大猷大欽大典公以嘉
靖丙午十一月二十八日終于正寢年七十有三訃
聞詔賜祭葬如例以某年月日葬于某山之原曩余

登朝與公相後先獲質其風采言論及觀履險大節
屹然壯之蓋未嘗不歎夫豐邑之遺也今追懷耆宿
不可作矣師善請書諸神道之石予重有感焉能不
爲之辭銘曰

惟聖有言仁必以世 明運洽隆曰在弘治出議盈
庭藹藹多士顯允陶公惇良茂達蚤升峻科亟踐諫
闥帝學緝熙至道陳納疊疊夙宵慮其遺闕群豎竊
柄炎聲沸天公諍不懾直也如弦卒罹毒罟投戍遐
邊人則曷堪公不爲病流離艱羈不廢廢詠六龍時
升氛曠清廓俊乂咸登起公臬岳爰自江右乂歷河

孺榮問以流惠孚孔宣乃昇旄鉞往蒞廢臺建策發
政務先綏懷遂陟貳卿司馬之職仍建臺蘇百粵是
即既仕而亨物望所歸荐荷 皇眷還之夏聞縣車
乞身以佚以息弗究厥施論者爲惜邦失老成士懷
遺直勒辭豐碑觀示無極

明故嘉議大夫南京都察院右副都御史趙公

神道碑

公諱載字文載初舉進士名君琰 武廟御賜今名
蒲州垣曲人也曾祖諱郎登洪武初進士爲監察御
史公父北平以風裁著稱祖諱信隱弗仕考諱傑以

公貴贈奉政大夫戶部郎中母普氏繼母衛氏贈侯
宜人公中正德丁卯鄉試辛未進士授戶部主事陞
員外郎郎中奉命督漕上疏極言漕政利病名藉藉
起陞陝西叅議撫治商洛嘗剿劇寇有白金寶鏹之
賜土魯番侵奪哈密爲邊患總督遠菴楊公知公才
薦爲甘肅兵備副使時議者欲掩魯番擊之公言外
攘必先內治宜實糧餉利器械固堡寨謹斥堠用間
謀及倣趙充國墾田故事食足兵乃可舉否則虛內
事外徒啓邊釁疏上議遂寢公於是銳意屯種開鹽
召商實粟塞下期年而士氣大奮所戰克捷番酋牙

木蘭帖木哥等率衆降者萬餘人又酌屯田便宜十數事條上俱獲允行陞陝西叅政仍兵備甘肅遂陞都察院右僉都御史巡撫其地仍兼理屯政公稽歲所入以革宿弊人不能爲欺邊方素不知學爲擇師儒以教學官弟子諸番人貢每乞增額公奏請遵定制驗放以省供億減益引課令本折兼輸以便商賈虜至督將士出戰凡所斬獲親覈功次以明激勸守邊數年政績大著陞南京都察院右副都御史提督操江旣去任猶陳邊務十二事曰此言所已試者俾後人守之耳然是時言者擿他事勅公奉旨聽勘久

之事得白衆望公起復用而尋已不祿矣公生成化
壬寅九月初五日卒嘉靖癸卯十月二十五日享年
六十有二訃聞詔賜諭祭命有司營葬復以邊功
錄其子應豐爲國子生蓋異數云配呂氏有淑行累
封恭人子男一即應豐再娶許氏以太宰襄毅公孫
女也於是少傅松臯翁屬書諸神道之石曰趙吾
姻也予重翁命不敢辭又昔在禮部得公建議諸疏
閱之蓋公器局闊大有經畧材而文學亦優贍所著
有西戎議畧兵備督儲巡撫諸奏議及畫脂漫興解
頤諸稿若干卷藏于家銘曰

金上卷一
緊古充國治兵最良墾田塞下制伏戎羌 明有中
丞夙閑將畧治職遊歷干城是託蠢彼番夷寇我疆
場衆議出師公戒先食野有耕獲廩有時儲邊患以
寧羗酋來歸孰構煩言而成營棘人譽用多卒枉以
直公則臥家衆望復起天不憖遺一疾而止 帝曰
念哉其有武功殊章異渥以貴其終蒲山之原仡仡
新阡氓勒有詞過者式焉